

Arrandschamaints**Il Glauser Quintett
cul toc «Schluep»**

Lavin La Vouta preschainta «Schluep» - un concert literar, un gö auditiv scenic, un raquint da Friedrich Glauser, e quai tuot in d'una ed interpretà dal «Glauser Quintett». L'occurrence ha lö in sonda, ils 21 marz, a las 20.30.

Il scriptur Friedrich Glauser ha passantà ses ons da sia vita illa clinica psichiatrica a Münsingen. Il «Glauser Quintett» interpretescha in seis program il plü nouv üna novella da Friedrich Glauser chi giouva eir in üna clinica. Il titul original es «Kollegen». La persuna principala es «Schluep». Per Paul Schluep, fliunz i'l sanatori Randalgen, cumainza quist di cun üna guotta illa gomma dal velo. Sia duonna es a l'ospidal cun ün'inflamaziun da las uraglias, il fit per sia chasa nun e'l plü bun da pajar daspö un quart d'on e sia paja tendscha malapaina per las ratas da seis radio nouv.

Il quintet Glauser intermediesch a interpretesch a quist raquint da Friedrich Glauser in forma da concert literar cun musica cumponüda bel ed aposte per quist program. Il cumponist Daniel R. Schneider ha creà stüdis da caracter musicals e cuntradas da clings per quintar l'istoria da Schluep. La musica porta l'istoria ed al listess muant es la composiziun ün'ouvräa chi funcziuna in sai. Lingua e cling as maisdan, as disturbans, s'algan in ün gö auditiv scenic, in ün concert literar cun ün raquintader paschiunà. (protr.)

**Ün drama bosniac
illa filmbar**

Scuol La filmbar i'l Cafe Benderer muossa in marcurdi, ils 18 marz, a las 20.00 il film «An episode in the life of an iron picker» dal redschissur bosniac, Danis Tanovic. Il film quinta un'istoria vaira «our da la vita d'un chi ramassa fieramainta veglia». Tanovic muossa üna vita dramatica illa povertà ed eir la noscha situaziun sociala dals Romas in Bosnia-Herzegovina. (protr.)

**La Chasa Jaura a Valchava
planisescha l'avegnir sainza
manadra ma perunter cun
Robert Grossmann sco responsabel cultural. Ils gronds noms
dal program annual sun: Tista
Murk, Not Vital e Laura Bott.**

JON DUSCHLETTA

Marco R. Gilly nun ha imbelli nüglia in venderdi in seis discours presidial in occasiun da la radunanza generala da la Società Chasa Jaura Val Müstair. Cha l'on da gestiun 2014 haja cumanzà «bizar» culla desditta dal contrat da lavour da la manadra dal museum, Inge Blaschke, e tuot las uondas cha quella decisiun haja chaschunà in seguit. Eir il tentativ dal intermediatur Alex Bänninger d'amegldrar la situaziun haja fat naufragi, uschè Gilly.

La società es suot squitsch. Il corset finanziar es flaiivel, sustegns impromis nu sun rivats ed il cas «Inge Blaschke» es dvantà, davo la seguonda desditta in november da l'on passà, ün cas giuridic. Tenor Marco R. Gilly pretenda l'ex-manadra la paja fin la fin da l'on 2016 e refusa a l'incontrari da bandunar las localitats ch'ella ha a fit illa Chasa Jaura. Vain pro, cha'l nouv arrandschamaints da l'on passà sun stats visitats be mediocar.

In avegnir sainza manadra

Instant cha'l güdischs as occupan dal cas «Blaschke», ha la società decis, da proseguir la via da quinderinavant sainza üna manadra, sainza ün manader. Quellas lezhas dessan gnir accumplidas da diversas persunas a paja d'uras. Tenor Marco R. Gilly haja la suprastanza da la Chasa Jaura decis inavant, d'adattar las uras d'avertüra dal museum a'l bsögsns dals visitaduors. Uschè sarrà avert il museum dürant ils mais da stà tuot eivna, cun excepziun da lündeschdi. Sco ulteriura masüra da spargn dess gnir s-chodada la Chasa Jaura be amo in cas da bsögn.

Decisiuns strategicas da la Società Chasa Jaura Val Müstair



In connex culla Chasa Jaura a Valchava nu d'eira «la baselgia adüna i'l cumün».

fotografia: Jon Duschletta

Reminiscenza a Tista Murk

Per invezza garantir la programmaziun culturala da l'on currant, es gnü ingashè il manader da la Chesa Planta a Samedan, Robert Grossmann. Insembel cul commember da la società, Schimun Murk, ha Grossmann sviluppà il program actual. Els han miss il Jauer e da seis temp fundatur da la Chasa Jaura,

Tista Murk, i'l focus dal program. Tista Murk (1915-1992) vess pudü festagiare in 100avel anniversari. El es gnü cuntschaint sco dramatiker, scriptur e promotur dal Rumantsch ma eir sco pionier dal radio e da la televisiun rumantscha. In collavuraziun culla Lia Rumantscha e la Radiotelevisiun Svizra Rumantscha RTR sun previsas diversas occurenzias in algordanza da Tista Murk ed eir ün cudesch dess gnir edi.

L'exposiziun d'art da quist on es reservada al artist da renom internaziunal Not Vital ed a la giuvna artista Jaura, Laura Bott. La vernissascha da lur exposiziun ha lö als 17 lugl.

Ulteriuras infuormaziuns a regard il program suot: www.chasajaura.ch

«Nervusità es üna malatia da nos temp»

Referat dad Olaf Koob da Berlin a Scuol

A chaschun dal 60avel anniversari da la Scoula Rudolf Steiner ad Avrona han ils responsabels organisà ün referat cun Olaf Koob da Berlin i'l local da cultura dal BES a Scuol. Il tema dal referat d'eira «nervusità, üna malatia da nos temp».

Il terz referat a chaschun dal 60avel giubileum da la scoula d'Avrona ha tematisà il fenomen nervusità chi dominescha il temp hectic d'hozind. Il referent Olaf Koob (1943) chi ha stügià medicina a Freiburg ed a Wanne-Eickel abita e lavura a Berlin. El es bler in viadi in Germania, ma eir sur cunfin cun referats e seminars. El ha eir collavurà pro progets chi's dedicheschan a drogas e problems socials. Koob ha scrit eir divers cudeschs ed es ün perit per malatias chi han da chefar culla nervusità e culla psica. Cha'l tema saja uschè vast, complex e cumplichà e chi nu's possa spettar ch'el preschainta in quist'occasiun soluziuns perdüraivlas, ha dit Koob. Seis referat ha muossà üna via in ün'atra direcziun co quella üsita: «Il problem es cha cul esser surdumandà dvainta l'uman nervus, ha da cumbatter cun problems psicosomatics

chi vegnan nomnats stress ed oter plü.» El ha constatà cha aint il tren, aint il bus nu discorran ils umans ün cun l'oter e cha tuot l'atmosfera saja superficial e fraida.

Guarir il corp cun incleger l'orma

«Socrates chi ha vivü avant 2500 ons d'eira da l'avis cha bleras masdinias nun hajan ingün effet schi nu's müda nüglia vi da l'orma da l'uman. El nu pudaiva incleger chi dà meidis pel corp e da quels per l'orma, causa cha quellas duos chosas toccan insembel», ha declerà il referent. 70 fin 80 pertschient da las malatias sun da taimpra psicologica. La dumonda cardinala es per Koob, che as stoja far na per guarir üna malatia, dimpersè per mantgnair la sandà? «Co as dessa viver sainza dvantar amalà perva dad influenzas negativas sco da l'electronica, telefonins, computers, gös da computer e viver in möd superficial e subjectiv», as dumanda Koob. Ün pled important es qua l'anim. Quel es üna sintesa da traís differentas chosas: Il pensar, l'immaint ed il resentir. «L'anim es immez nos corp sper il cour.» Scha l'uman es bun da far alch special sco pitturar, far musica, as muantar, na las laviours dal minchadi dimpersè individualità, lura as chattas el, sco cha'l referent ha dit, eir corporal-maing bain.

Il tempo dvainta «velozifer»

Scha l'uman as muainta svelt tras il muond e nu piglia il temp per reflettar e per registrar quai ch'el vezza, lura cumainzan ils problems: Cha'l tempo dvainta «velozifer», voul dir veloce per svelt e zifer per Luzifer. «Nus nun eschan plü preschaints e la nervusità crescha», ha'l manià. Quel tema es gnü perseguità dad homens dal fat chi han scrit eir cudeschs ed han rendü attent a quel fenomen. «Nus restain sans scha nus eschan buns da registrar pacas robas dal minchadi, ma quellas in ün möd intensiv.

Insuffizienza dal gnirom ha per conseguenza cha'l umans survegan depression.» Chi's sapcha intant cha'l gnirom e'l ranuogl as recreeschan tanter las ündesch la saira e las traïs la not. «Schi's vezza co cha la giuentüm d'hozind es dürant quel temp activa in discos, cun consumar alcohol ed otras drogas, lura nun esa da's dar da buonder cha quels ston gnir amalats», ha dit il perit. Ch'in sia pracha haja'l fat surasen cha glieud dad oters pajais haja suvent greiv: «Scha'l cheu d'ün uman per exampel da l'Italia es a Köln, seis cour però a Palermo, po quai esser per quella persuna fich pesant. Blers d'els han adüna darcheu malatias chi han da chefar cun quella situaziun per els dischagreable.» (anr/bcs)

Olaf Koob ha referi in occasiun dal giubileum da la Scoula Rudolf Steiner ad Avrona.
fotografia: Benedict Stecher